

宋・張

浚撰

易學叢
書續編

紫

巖

易

傳

廣文書局印行

中華民國六十三年九月初版

易學叢
書續編

紫巖易傳

裝精全一冊定價新台幣：三百元

版權所有
不准翻印

撰者

張

浚

發行人

王

道

榮

發行所

廣文書局有限公司

臺北市羅斯福路二段九號之三
郵政劃撥二一九九號
電話三四九六〇號

經銷者

全國各大書局

內政部出版業登記證內版台業字第一三二四號

紫巖居士易傳第一

乾之履

張浚

上經



乾下
乾上

乾元亨利貞

乾道也元亨利貞德也道一也德有四焉自然之理自然之序自然之數不可易也故夫數者一二三四是也數至四而備矣合之爲十別之爲五莫非自然故夫天有四時地有四方人有四端五實周流乎中五者皇極之中道也乾道也乾以中運元亨利貞終始不息生化之功於是乎出元以始

之亨以通之利以裁之貞以固之天人之理無餘蘊矣

初九潛龍勿用

陽潛於一靜養之功不可不謹說之築巖尹之耕野望之釣渭顏子之陋巷大舜之深山皆勿用也而虞舜之德正配乾周文實法舜

九二見龍在田利見大人

三畫一爲天二爲地三爲人有天斯有地有地斯有人以數言也六畫一二爲地三四爲人五六爲天天處乎上地處乎下人處乎中以位言也見龍在田其德著見言行之脩已聞於時不有應也德

罔克施利見大人志可行矣舜三徙成都利見於堯其此時乎

九三君子終日乾乾夕惕若厲无咎

天地設位能以人成乾至於三三才備具君子觀象進德脩業以配天地乾乾動罔非天也既惕且厲畏天之誠見於此矣德業其有不大哉雖然君子何惕君子出而同人蓋將與天下共其憂是以惕乾三四不言龍龍之在人其變莫測不可以形求舜由仁義行聞善言善行若決江河莫之能禦乾乾也

九四或躍在淵无咎

四陽既壯其氣上達德成於內天其察之故或躍
下應初九正靜之心不忘脩已故在淵書記舜元德
升聞莊子謂受命於天惟舜獨也正或躍在淵也
九五飛龍在天利見大人

虞舜於是不得已而紹堯之統矣舜豈以得天下
爲心哉有若飛龍勢莫可禦夫德同於天然後能
需天之澤聖人脩德於身積非一日時至德行孰
不觀化而被惠邪禹稷契皋陶之徒相與出而輔
舜見大人之利莫尚於此

上九亢龍有悔

過中故亢九而六之天地之數將窮於是聖賢處

此猶難也而況其下者乎蓋居富貴極至之地耳目之所感移意氣之所動蕩有不可勝言者矣故有悔云

用九見羣龍无首吉

聰明聖智守以愚貴爲天子守以謙富有天下守以儉皆用九之道九復爲一羣龍畢應行中履正不自尊貴爲吉孰大帝庸作歌其在是歟

彖曰大哉乾元萬物資始乃統天雲行雨施品物流形大明終始六位時成時乘六龍以御天乾道變化各正性命保合大和乃利貞首出庶物萬國咸寧萬物皆出乎一一氣之運形以之統雲行雨施功

用出矣自乾而坎自坎而艮生生化化終始無窮
理既大明位斯時定乾何爲哉乘此六陽之氣均
調造化遲速進退制之在我元亨之功於是爲大
乾道變化聖人贊乾之功也乾之變化聖人成之
聖人正心誠意以默贊乾元變化代興凡物有生
各得其正天地大和參之爲一利貞行矣首出庶
物萬國咸寧不亦宜乎乾元之德至是而備四德
分之爲四合之爲一於一之中四以之行

象曰天行健君子以自強不息

天以誠運其行至健生物大功自是流出君子法
天去僞存誠求以自強自強而後能不息記曰不

息則久久則悠遠悠遠則博厚博厚則高明且夫君子之所不息者何道曰善道也君子勉於爲善生物之德可以配天功用大矣

潛龍勿用陽在下也

見龍在田德施普也

終日乾乾反復道也

陽之生數中於三三三而九其變無窮故乾之九三有通變不息之道反復道謂心念之所起無須臾而離於道上下互體俱乾爲乾乾爲反復道乾道也三位在辰爲終日

或躍在淵進无咎也

進不失正何咎之有惟靜故正乾體具天一成數
四應初爲在淵居下卦上爲躍

飛龍在天大人造也

九五得陽數正中數與德符斯可以大有爲於天
下蓋龍至於五而德全德全故能變能化其道若
神而功利所及者大

亢龍有悔盈不可久也

盈則失天人心夫盈天道所虧地道所變鬼神
所害人道所惡是安能久哉有大物者必用謙謙
斯亨亨斯有終矣

用九天德不可爲首也

高其目而下其耳者匪天也夫有爲首之心天下孰告以善道何以主利萬物而配天之德也

文言曰元者善之長也亨者嘉之會也利者義之和也貞者事之幹也君子體仁足以長人嘉會足以合禮利物足以和義貞固足以幹事君子行此四德者故曰乾元亨利貞

仁者人之本心也體之在我天下歸仁故曰體仁足以長人萬善積於中則動皆中禮故曰嘉會足以合禮我之爲義本以利物何往而不適其宜也故曰利物足以和義天下之動貞夫一貞固而事業其有不立乎故曰貞固足以幹事不言智而言

貞惡夫智容有不貞者貞固而其爲智也大矣
初九曰潛龍勿用何謂也子曰龍德而隱者也不易
乎世不成乎名遯世无悶不見是而无悶樂則行之
憂則違之確乎其不可拔潛龍也

紆朱懷金不足以移顏氏之樂與以天下不足以
改夷齊之操曰不易乎世知我者天夫何悶所樂
在道夫何憂

九二曰見龍在田利見大人何謂也子曰龍德而正
中者也庸言之信庸行之謹閑邪存其誠善世而不
伐德博而化易曰見龍在田利見大人君德也

中之用大矣言靡不信行靡不謹自然之符莫可

掩也君子方且閑邪於耳目所聞見以內守其誠
謂夫有而爲之不可易耳閑邪而誠自存曰閑邪
存其誠善世不伐謙德行也德博而化人心格也
一則潛二則見爲言行上下俱陽爲閑邪一在中
爲存誠初二皆地位二位近人爲田爲善世爲博
二陰數爲不伐

九三曰君子終日乾乾夕惕若厲无咎何謂也子曰
君子進德脩業忠信所以進德也脩辭立其誠所以
居業也知至至之可與幾也知終終之可與存義也
是故居上位而不驕在下位而不憂故乾乾因其時
而惕雖危无咎矣

三四位在人人道以德業爲大忠信則不欺於天
人故德進修辭立誠則有以感動天下心故業修
知至至之以內充乾德故可與幾知終終之以外
盡臣節故可與存義文王在岐則然詩曰惟此文
王小心翼翼文王雖危无咎矣

九四曰或躍在淵无咎何謂也子曰上下无常非爲
邪也進退无恒非離羣也君子進德脩業欲及時也
故无咎

自三而四卦體於是分發上下進退義夫君子進
而有爲豈曰富貴是圖而爲一己私計哉蓋將以
大其德業而生利萬物於天下其心合天其身何

咎且四陽用事萬物發生君子體之時安可失也
九五曰飛龍在天利見大人何謂也子曰同聲相應
同氣相求水流溼火就燥雲從龍風從虎聖人作而
萬物覩本乎天者親上本乎地者親下則各從其類也
水火之於溼燥以氣求也風雲之於龍虎以聲應
也水火以相制爲用有君臣交修之道風雲以相
感爲用有君臣遇合之道聖人有作如日在天萬
物畢照凡以得聖臣爲之輔若水火風雲之流從
耳故上治則日月星辰得其序下治則鳥獸草木
順其性天地之間豈容有失其道理者哉乾五備
皇極數水火金木之象具其中

上九曰亢龍有悔何謂也子曰貴而无位高而无民
賢人在下位而无輔是以動而有悔也

无正位曰无位變坤陰曰无民民遠之賢去之動
悔固宜矣嗚呼爲君者其戒於亢哉

潛龍勿用下也

見龍在田時舍也

因時而動動得所居生利之功於是乎出

終日乾乾行事也

至誠不息以應於天曰行事

或躍在淵自試也

視吾德之所格者何如曰自試聖賢以生利萬物